



Aqqalu C. Jerimiassen

UKA 2025/155-1

Atassut

14. Oktober 2025

Sineriak tamakkerlugu oqaluffeqarnikkut aserfallassimanermut takussutissamik iluarsartuussinissamullu pilersaarusiortoqarsinnaanera pillugu Naalakkersuisut UKA2026 nallertinnagu agguaassassamik nalunaarusioqqullugit aalajangiiffigisassasutut siunnersuut.

(Inatsisartunut ilaasortaq Knud Kleemann, Atassut)

Upperisaqarneq upperisarisiornertu paquminartuujunnaartittariaqarpagut ullutsinni nutaaliaasumik inooriaaseqarnitsinni.

Ilageeqarnikkut nukittunerusumik anersaakkut nukittuumik inissisimasinnaaneq inoqaterpassuatta sineriasuatsinni naleqartigaarlugu ingerlappaat.

Inooriaatsikkut ineriartorneq ukiuni kingullerni allaaneroqaaq, tassanilu malitseqarlunittaaq, ukiuni makkunani aningaasanut inatsit eqqartortillutigu ajorluartumik missukutarinerpaasagatta ilagilersimasaat tassaasoq ilageeqarneq.

Oqaluffigut sumiiffippassuarni kataapput, suliffigissaaneq eqqarsaatigalugu ullutsinnut tulluanngilluinnartumik palasit palaseqarfinnilu atorfeqartuusut atugassaqartinneqarput.

Atassummiit inuit anersaakkut pisuujunissaat pingaartipparput, taannaasorigatsiguttaarmi aamma inuunermi qaamanerusumik imminullu napatilluarsinnaanermik upperinerunermik, ajornartorsiutit inuttut qaangerniarnerini inuttullu ingerlariaqqissinnaanermi aqutissiuinermik ammaasilluartartut ilagigaat, tassalu upperisaq.

Uagut inuiaqatigiit amerlanerussuteqarluartugut lutherikkunnut naaggaartunut upperisaqarluta kristumiussuseq ingerlapparput, taannaavorlu aamma nalliuttut sapaassuit allallu nallernerini aallaavigilluartaqarput. Kuisinnitsinniit apersortinnissatta tungaanut, katinnermi palasimut, naalakkaap oqaasiinik pilluaqquneqarneq, ilisinermi naggammik qanigisamik qaniuinermi palasip ajoqillu ulluni oqimaassinnaasuni nukkannagaartumik oqaaserisagaat tamatta arlaatigut pissarsiffigilluartaqarpagut.

Inuiaqatigiittullu maanna ajornartorsiutit allallu sorpassuit piutillugit, arlalippassuartigut palasit sineriasuatsinniit oqaloqatigineqassallutik siunnersortaalluassallutillu piareersimajuartaqarput, taakkuli allaffeqarfigisaat oqaluffiillu qiviassagaanni, allanngutsaaliugaanertik pillugu aaqqissuunneqarnissaat kinguarsarneqartuartsimanerisigut, ilaatigut natii qilaavi allallumi kataalluinnalersut tusarsaapput. Nunatsinni biskopitta eqqaasittuartaqpaatigut qanoq oqaluffippassuit sinerissamiittut suliassaaiginerinik.

Ajoqersuiartortut tikereeranniit sorpassuit ajorsinnaasut ajoqersuiartortut piliarisimasaat pulaffigineqartarluaqaat ullusinni ingasaassiniaallutik avissaarniatut allamiuluartullu isaannit. Uanili nunatsinni amerlanerussuteqarluartut anersaakkut aallaavigissallugu toqqarsimasaat ataqqilluguttaaq



inissaqartittariaqarparput, sineriammilu kikkorpassuit naalakkap oqaasiinik iluartunik sulit
tusartinneqartarnissartik qanoq pingaartitsigineraat facebook-iinnarlunniit ammaraanni ersareertarpoq.

Assersuutissaqqissut ilaat, Ilimanami oqaluffik qeqqa kisimi tunngalersimasooq, sinnera
qangataannapajaalerluni inissisimasuusoq, takuinnarlugu qanoq iluarsartuuttariaqartigineranik
sanasuunngikkaluaraanniluunniit takuneqarsinnaavoq.

Qujanarporlu naalakkersuisut uani Atassummi siunnersuutigisatsinni sulipitsaanerulerlugu
allannguutissatut sinnersuuteqarmata, nalunaarusiortitseqqaanngikkaluarluni maannangaaq suliniutit
erseqqarinnerungaartumik ingerlariaqqinnissamik tikkuussaqaarnertik naqissusermassuk.

Taamaattumik Atassummiit taamatut oqaaseqarluta, Naalakkersuisut allannguutissatut siunnersuutaat
taparserparput, taamatullu iluseqartillugu aappassaaneerneqarnissaa innersuullugu.